

# INUIT ATAQATIGIIT INATSISARTUNI



UKA2022/97

Ulloq saqqummiivik: 10. November 2022

Illit atit: Mariane Paviasen

**Sapigalinnut ulluinnarni nerisassat nioqqutissat nunatsinnut ajornannginnerusumik eqqussorsinnaalernissaannut Naalackersuisut nalunaarusioqqullugit peqquneqarnissaat pillugu Inatsisartut aalajangiiffigisassaattut siunnersuut. Nunaniit allaniit nioqqutissat taakku eqqussorsinnaanissaannut inatsisitigut qanoq allannguinnissaq pisariaqarnerisq, qanorlu akimikkut Danmarkimiit nioqqutissanut unammillernerusinnaalersinnaaneri nalunaarusiamut ilanngunneqassapput. Nalunaarusiaq kingusinnerpaamik UKA2023-mi Inatsisartunut agguanneqassaaq.**

(Inatsisartunut ilaasortaq Aqqalu C. Jerimiassen, Atassut)

Inuit ataqatigiinniit siunnersuummik pingaarutilimmik qaqitsisoq qutsavigaarput.

Siunnersuutigineqartoq nunatsinni sapigalinnut nerisassatigut sapigalinnut akitigut unammilligassaaginnaratik, pisiarisinnaasani qinigassanik amerlanerusunk nioqquteqartoqarsinnaanissamik aqutissanik ujartuina paasisinnaalluarparput.

Nunatsinni assigiinngitsunik sapigallit tusarsaaleraluttuinnarfianni siunnersuut una tulluurtuuvooq aammalu isumaqatiginartorujussuulluni, nunatsinni sapigalittatsinnut atugassarititaasut maannakkumiit pitsaanerungaartariaqartut Inuit Ataqatigiinni isumaqarpugut, illoqarfimmi mikinerusumiit aggersuulluni maani Nuummi pisiarfiit neqeroorutaat qanoq isorliunerusuni neqeroorutigineqartuninngarnit allaanerutigineri maluginiagassaannngitsuunngilaq.

# INUIT ATAQATIGIIT INATSIARTUNI



Nunatsinni pissakinnerusorpassuit isertitakitsorpassuit nunaqqatigaagut, taakkulu aamma sapigaqarsimagunik annertuumik eqqugaasarsimanissaat qularnangilaq, qanorlimi assoruunnartigaa meerarisami sapigaqartup inuussutissaqartinniarnera ilaannili tusarsaasarmat sapigalinnut tulluarsakkanik nioqqutissanik pisiniarfiit nunguutsisartut taamallu pisoqartannginnissaa piaartumik sulissutigineqartariaqarpoq, niuertullumi aamma uani akisussaaffeqarnerat erseqqissaatigineqartariaqarpoq pilersuisussaataannermik isumaqatigiissutit eqquutinneqartarnissaat pingaarutilerujussuuvoq tamannalu sapinngisaq tamaat KNI-p inoqarfinni tamani pilersuisuusup isumannaartariaqaraa eqqaasitsissutigisariaqarparput.

Tamannali naammanngilaq siunnersuuteqartup malugisimasaattut Inuit Ataqatigiinni maluginiagaqanngitsuunngilagut sapigalinnut nioqqutissat tamatigut naliginnaasuniit akisunerusunngorlugit nioqqutigineqartarput annermik malunnarluni nunaqarfinni, illoqarfinnilu mikinnerusuni, tamanna allanngortittariaqarpoq, sapigalittattami nammineq pisuussutiginnigilaat sapigaqalersimanertik taamaattumik pisariaqartitaat aamma sapigaqanngitsut nerisarisinnaasaatulli akeqartinneqartariaqarnerat aqutissiuunneqartariaqartoq isumaqarpugut.

Aammattaaq siunnersuuteqartoq nersualaarusunnarpoq misissuilluarsimalluni siunnersuummik qaqitsimmat, periarfissat akikinnerusut suunersut ilanngullugit saqqummiuppai.

Taamak oqaaseqarluta siunnersuuteqartoq Inuit Ataqatigiinniit taperserparput, Taamaattorli takusinnaavarput naalakkersuisut siunnersuummik itigartitsisut taakkulu misissorluarneqaqqullugit ataatsimiititaliamut suliassanngortipparput.

Qujanaq